

江陰縣志卷之三十

識餘

正史之外有別史雜史著錄家所以不廢者遺文瑣事不能登於正史而又不宜聽其湮沒次而存之亦參考之佐也斯志應載之事分見各類其無可附麗及微涉奇異不敢輕信以示誣者師別史雜史意慎選前志所載并近所傳聞採訪贅於簡末名曰識餘閱嘗論之幽獨無遺憾者爲完人纂述無遺憾者爲完書完人固不易完書亦豈易言哉志終而以雜說綴之亦史家之體例也志識餘

江陰縣志

卷三 識餘

一

楚考烈王封黃歇爲春申君請地江東城故吳墟以爲郡邑考泰伯之墟在無錫春申故城實無錫之墟初不在江陰也黃田申浦黃山君山因春申爲號者錫之山川土田固古封君事也然則江陰之地以爲春申賜履所及則可以爲春申所居則不可

江陰稱芙蓉城相傳卽王子高遇仙人周瑤英故事事涉虛幻旣見之蘇東坡詩置弗詳可也

督學署本在宜興明萬厯間移駐江邑割季科清機園爲之署中荷花池卽雪浪湖池邊有屋五楹卽賜閒堂也縣治有鐵貓四二在儀門左右二在月臺左右身埋土中

僅露一爪大如人股聞諸長老云江陰縣治爲舟形故以此鎮之

御史尙維持知縣杜華築楊舍堡城里人許蓉爲作築城樂詩曰築城樂因增保障無驚愕昔年寇亂無可逃今魚有水鳥有巢昔年接浙猶自棄今日倉箱皆可寄吁嗟乎城之高兮尙可量公之德澤垂無疆隍之深兮猶可測公之功業垂無極古言民意卽天心願公子孫世世兮腰橫金

楊舍爲暨陽古城廢址復築萬厯間沿江有倭警居民夜聞風起城濠間有呼嘯聲意寇至恐甚於門隙窺之見

江陰縣志

卷三

識餘

二

火光黎明視之河中成冰山一座亭臺闌檻坡磴樹木具備躡草履可登其巔居民俱藉以避寇

唐張蘊授江陰令牒云前攝蘇州長洲縣令文林郎前守洪州督府參軍張蘊牒奉處分宰千里之邑寄百里之命異懦則絲芴繩亂用剛則土曠民離苟得適中庶幾可守前件官窮經任已明吏藩身御札承制正授常州江陰縣令表次錄奏仍牒舉者天復三年

洪武三年十一月給發民間部印勘合戶帖首行云江陰縣提調官下分注知縣錢文德縣丞傅學第二行司吏麋宗文第三行典史朱貫道宏治間知縣黃傳修志時

於洪武三年任書知縣吳志遠按此三年任乃錢文德
非吳也且錢傳麋朱四姓名無一見者時邑尙未設主
簿黃於典史下注云初名掌史觀此豈掌史之名更在
前耶吏宜列於官之後而帖列吏於典史前豈當時吏
在典史上耶前志俱未明晰今歲久不可考矣
駱駝橋相傳建橋初成或問石匠橋圯何時匠云橋若墮
駱駝過意江南無駱駝言橋決不圯也萬厯間邑人顧
玉川牽駱駝過此橋果卽傾

峭岐實蕭崎二字陸道經由里山水道自馮涇河入界荻
葦蕭森路徑崎仄故名順治乙酉大軍攻邑城未下鄉

江陰縣志

卷三

識餘

三

民保聚村落旗兵往來衝突至鎮界詢土名云蕭崎卽
回騎去蓋蕭與消崎與旗同音昔漢高祖欲宿柏人詢
名曰柏人者迫於人也不宿而去亦此意

楊舍堡城東舊有茶亭後閣施茶濟渴李忠毅記之曰經
言施者一燈一縷皆得作佛何以故如一滴水具大海
味是一念緣了無量法非愛非懼不忍故捨此不忍心
佛說慈悲斷絕一切人相我相及多寡相卽心卽佛無
法可說一縷所引絲絲皆續一燈嘗紅光明圓滿如來
眾生等如是觀有何差別我聞楊舍有一居士名曰某
某創此善緣構亭浚井普濟渴者願廣力微諸大檀越

歡喜佈捨爰建斯閣田若干畝有僧是主凡此閣中瓦石木屑杯水微塵聚眾慈心普大法雨伸餘張子具爲予言向此居士鄰屠肆間冤號交作合掌拜語滅度是人是人悲悔念轉刀落而此居士勤閔事母母食斯食母喜亦喜依依母旁宛宛孺子以供母餘廣作佛事予時聞之贊歎希有人之無良忍於其親何有他人滅離父母非佛宗旨惟此居士含赤子心發慈憫性俾鼓刀手立地成佛俾行道人望梅止渴嗟夫斯地斯民或愚或黠窮一忍心鼓刀以屠戕禽獸生乃至結習鼓筆如刀吸生民血析骨易子供彼貪殘是可忍也其孰能記

江陰縣志

卷三

識餘

四

嘻願力無盡冷煖自知法因隨喜業根斯斷請登斯閣惻然興思瞿然削指則此施者是真導師仲餘愴然曰請以吾子之言告也

南史王敬則傳有劫部逃入暨陽陸主山敬則遣人諭出之按江陰無陸主山且邑山皆平淺無可藏匿之處此前史之誣也

甕牖閒評云陰陽家甲戌乙亥山頭火江陰君山頂上有塔一所乃甲戌日建旣而被焚迄今無修建者

王乳泉在定山之陽食物本草云味甘主補五臟六腑榮養肌骨升陰水以制火熱生津液止肺渴

解崇泉俗名貪泉在貪山幽谷中食物本草云味甘主清熱止渴抑火除煩解鬱消憤下氣寬膨

羅志云歲丙午張士誠分兵來寇太祖親率兵督戰追至巫子門急擊之俘獲無算班師入江陰城愛其山水秀麗欲陞爲府旣而周覽四顧謂羣臣曰君山主也而卑由里客也而高於法不利乃止

巡撫周文襄以江潮入內匯於運河潮鬪則沙淤建南北兩閘分日啟閉又造雙櫓快船尾縛鐵線帚募水手於潮落時掉船急行沙隨潮去以省歲濬河費知縣錢鎬開崇鎮河見工獨後審視地經兵燹瓦礫累積遂給工

江陰縣志

卷三

識餘

五

食加倍崇鎮以南潮勢緩而岸沙漲河身多軟壩分別均役不以他河例也

邑中水利夏港最大此前代事耳今則黃田港最大而夏港日淤潮汐所至僅十餘里矣

明季糧長之役多受解糧開河累糧戶苦雜徭加派奸民更以人命居奇廣東順德進士岑之豹字子文天啟五年任事刻意綜覈盡除宿弊惜以科場被累論罷

乾隆二十四年江陰縣詳趙元槐報陞平北東興等沙復漲草灘一案奉撫部將平北沙合界西半等圩草灘九百十三畝零撥入育嬰堂書院歸公以四分歸育嬰堂

六分歸書院三十六年本道勘丈改名段山沙丈增四畝七分八釐零撥育嬰堂戶名田灘三百六十四畝七分八釐書院戶名田灘五百五十三畝
嘉靖中詔祀聖賢用木主去像易封號改曰先師廟一洗前代之陋而張袞獨以爲不可且主修邑志列其奏疏於中猶未免有固執之見也

名宦祠康熙初圯木主僅存三五教諭荆子邁修葺新之雍正十三年教諭田有伊將祠鬻與門斗劉衡居住諸生邢炳嚴學誠等具控至乾隆五十二年始行清釐重建

江陰縣志

卷三

識餘

六

王充論衡云季子讓國耕於延陵之野當夜出遊見道左遺金有披裘負薪來者呼而語之曰子盍取彼金乎薪者怒而作色投鎌於地曰何子自視之高而視人之下也五月披裘採薪豈拾遺金者哉季子問其姓名不告而去

中興書曰庾希字始彥司空冰長子累遷徐兗二州刺史希兄弟貴盛桓溫忌之免希官初郭璞筮冰子孫必有
大禍故希避地暨陽及溫誅希弟柔倩聞難逃於海陵後還京口聚眾事敗爲溫所誅可見數之前定而趨避終不能免者雖以景純之先知其如之何

宋范宗古爲江陰軍在乾興元年明年天聖元年有重建軍治鼓角樓事是宗古知江陰軍斷不在景祐年也表載景祐三年知軍劉効賢而范文正作記明云景祐三年以後碑文悉據此文爲證推原其故想范宗古建廟實在乾興天聖間而文正立碑補作於景祐年耳王介甫唐詩百家選乃常熟毛辰所得江陰徐氏藏本計百有四人有乾道己丑倪仲傳序畧云予自弱冠肄業江陰曹香溪之門嘗見是書頃有親戚宦南昌者得之臨川以歸惜其字畫漫滅故鏤板以新其傳云

韻語陽秋云東坡在儋耳時葛延之自江陰擔簣萬里絕江陰縣志

卷三

識餘

七

海往見畱一月坡誨以作文之法延之以親製龜冠爲獻坡受之而贈以詩云南海神龜三千歲兆叶朋從生慶喜智能周物不周身未免人鑽七十二誰能用爾作小冠岫嶠耳孫創其製今君此去能復來欲慰相思時整視

清波雜誌云宣和間詔路允迪傅墨卿使高麗介其屬江陰徐兢倣元豐中王雲所撰雞林志爲高麗圖經稽考詳備物圖其形事爲其說蓋徐素善丹青者也乾道間刊於江陰郡齋

都督張英於宋淳祐間禦金人有功元王逢題其像云有

威可畏有儀可象以武起家爲國良將弓馬熟嫻韜鈴
素習勇冠三軍功高百辟金人喪氣宵遁屏跡天生英
雄再造宋室諸葛之亞孫武之匹泰山巖巖邦家柱石
今北鎮巷都督坊其遺蹟也

紹興十八年王佐榜進士第五甲九十名朱熹第四甲一
百六名王訢第一甲七名葛邵時邵之叔立方爲參詳
官卽今同考官也朱子等俱出其門下

邱壽雋文定長子宋嘉泰三年知武進縣事值奔牛閘壞
伐石於黃山修復之間舊用木歲久輒圯壽雋皆易以
石又爲屋覆其上開禧中通判常州崇祀縣學名宦祠

江陰縣志

卷三

識餘

八

劉師勇山東文安人宋季爲都統元師侵宋南下常州降
師勇同王安節克復之朝命姚訔知州事元伯顏使降
帥呂文煥復攻破之姚訔死難師勇突圍力戰得脫道
經江陰悟空寺射一箭於寺塔頂題詩寺壁始行意氣
慷慨扈宋末帝駕於粵帝沈海死師勇逸去江陰城外
有一僧長八尺終身未嘗北向坐恆寶一篋及卒開篋
視之則師勇官誥也方知其遁跡爲僧云

葉森字仲實遭宋季亂元師下江南將抵邑森偕里人逆
元將於陳沙莊將畀以一矢及尺帛符合境賴保全森
性穎敏通蒙古字學選爲譯史監運綱船有功授鹽官

州判時有海寇森率眾擒其魁十八人歲大饑森義激巨室前後捐糧六千餘石鈔八百餘錠拯活六萬餘人調新喻判官擢上高縣尹

元世祖朝揚州學正李淦劾葉李擢爲江陰路教授以旌其直

王逢父惠之爲元庫使有隱德逢幼從陳漢卿學詩漢卿學於虞集逢得其傳故能與元盛時楊范諸公頡頏並驅至正戊辰逢壽七十自作壙銘云待旌忠孝節義鬼蓋實錄也子掖洪武初任通事轉翰林博士掖子徠以才德薦未授官卒徠子輅宣德中以秀才舉授南康府

江陰縣志

卷三

識餘

九

照磨卒於官二子曰顏曰孟貧不能歸寄籍星子縣孟爲社學師顏之子勸爲南康郡庠生不墜其家聲云

王逢有寄劉小齋張溝南吳中州夏師魯鄧毅夫邱宗大詩云鄉里遺賢軫念多薦辭金聘守微疴前途絕望楊宣雀亂水長窺董養鷺季子有碑時打字莫王無鬼夜操戈春風凍解醅新熟試覺歸舟駛一梭又有送徐桐還蕭崎詩云世亂同予出時清先我歸寒燈伯淮被春色老萊衣贈吳惟諒爲宋八行先生後人詩云不屑三家仕眞爲八行孫水雲菰米澤烽火棣華園可見元季雖亂而鄉閭人物自在也

沈蒙字伯亨西秦人從陸文圭學江陰亂偕友趙乾宗往依馬沙巨室馬沙又亂寇執蒙索巨室主所在蒙卒不言遂與趙俱遇害

靳利安至正間任江陰尹陞州理問時徽寇入常州無錫江陰東八鄉民多脅從者既而浙東帥觀孫復常州討無錫敷名開化兩鄉從逆者欲加兵於邑利安有姪從王逢學逢因說利安以勸帥止殺利安爲言於觀孫民免於難左丞黑黑知之嘉獎利安并擢用逢逢辭請掩敷名開化遺骼有詩云分藩多賢勞不敏忝賓客雖無官守縻亦復與言責二鄉虔劉禍慘甚長平厄先王制

江陰縣志

卷三

識餘

十

禮經孟春當掩骼僕夫有難色歛段纔任策駸駸度岡坡渺渺循藪澤稍稍煙微青歷歷野四白游魂行草上遺老候道側我豈物役徒茲來出胸臆皇天久垂憫赤子非寇敵鴟鳥何不仁銜啄血更漉因歌戰城南風悲淚狼籍

邵亨貞字復孺嚴州人博學工文精篆隸與王逢交入明爲松江府教授有蛾術文集十六卷天啟間江陰李如一至赤岸田家見屋梁懸故紙一束取視之乃復孺親筆稿也問其人係復孺後裔自松江流寓赤岸後有學菴詩集一卷乃復孺子伯宣所作復孺女嫁張藻仲卽

宋濂送張宣歸娶詩所云英年歸娶奏金鑾喜得天顏一笑看者也

倪瓚作亡室像詩云幻形夢境是耶非縹渺風鬟雲霧衣一片松閒秋月色夜深唯有鶴來歸梅花夜月耿冰魂江竹秋風灑淚痕天外飛鸞惟見影忍教埋玉在荒村後題云君姓蔣氏諱圓明字寂照暨陽人也年二十一歸於我勤儉雍睦鄉里稱其孝敬歲癸巳奉姑挈家避地江渚又一年不事膏沐游心恬淡時年四十有七矣如是者十一年癸卯九月十五日微示疾十八日清晨儵然而逝甲辰五月二十四日題

江陰縣志

卷三

諷餘

七

廖廣甯泰定進士江西清江縣人至正末任江陰縣學教授元亡寄居江陰子孫冒舅氏黃姓太僕正色其七世孫也前志俱未載

李鳳字時可元季居馬沙喜結客楊維禎嘗浮江過其家鳳訪之舟中器黃金犀毗相半也及李燕維禎瑪瑙作埒赤玉盤盛脯白玉斗盛漿皆盈尺佐酒歌舞者皆妙麗維禎爲之色動龍鳳中再徵粟助軍皆以萬石應後竟治巨艦浮海去

陳楚良馬馱沙人官南陽巡檢至正末遭亂楚良與女元奴同被執女赴水死楚良抗罵遇害

前志列入名宦訛作馬馱少巡檢今

從靖江採訪更正剛
去名宦傳附志於此

許恕號北郭善醫部使者薦授澄江書院山長

買住昂霄以江陰副萬戶累遷中政院判官福建憲僉會
亂航海歸以孝聞

司大者里中陳氏佃也貧不能出租主將以轉質他姓有
李慶者賂主家兒得之償值輕其什之一司心不平李
與所常用力及爲立券者具雞酒飲司隨之李欲却司
輒先飲之卮酒司忿恨去對妻語計將焚之妻極口諫
曰吾之窮命也奈何仇人不聽夜持火往忽聞內有人
婉司竊念吾所仇者李也何故殺其母子遂棄火溝中

江陰縣志

卷三

識餘

三

歸司以所償錢沽酒遂不乏時更有餘而李日益貧更
十年復出田質陳氏司還用李計復焉錢比前又損其
一司憶爲李所辱具雞酒亦如之李忘前過反怨怒歸
積火破盜中夜抵司家司妻方就蓐李猶豫間聞人啟
戶聲遺火亟走旦日司得火器驗器底有李字因悟昔
我焚彼以產子不欲焚今彼焚我而我妻亦產子而亦
不焚此天也持錢五千往謝李飲以酒而語其故更相
約爲婚姻厥後兩家皆饒裕元至正間事也

軍人張旺頑狠無賴嘗夜盜城西田父菜被執濡其首於
溺池而釋之以故仇恨一夕蓄火瓦罌往燒其家道觀

溝時月色微明畫師吳碧山尙未寢偶聞步履聲穴窗窺之見張前行而殤鬼數百踵其後頃又聞步履聲復窺之則張回而青衣二人前導焉吳甚驚怪張乃吳所素狎者且往叩張初不承及詰之審因以前事告且曰我實欲燬其室以快宿憤因念冤孽相報無己遂棄火歸他無所見也吳告以其詳張大感悟卽舍俗出家人稱之曰張道人元至正五年事

明史勳臣傳諸將郭英廖永忠陸仲亨周德興王志金朝興楊璟李新胥有下江陰之功獨永義侯桑世傑攻江陰石牌海寇欒瑞挺戟躍馬陷陣死道光八年附祀二

江陰縣志

卷三

識餘

三

侯祠

明初一野叟其生年月日時與太祖皆同太祖聞而欲殺之召見問何業曰養蠶十三籠資其蜜自給太祖笑曰朕以十三省兆民爲籠蠶乎厚賜遣還

張宣工草書高啟贈詩有昔聞汝祖東吳精醉傳草聖醒而驚女今能飲不滿杓逸氣欲與相崢嶸之句

洪武八年二月以太平府儒學教授胡隆成爲國子監助教胡字大雅江陰人博學能文至正中貢士見楊士奇

明政記

永樂中江陰吳衍字彥卿能通譯番書嘗從內監鄭和馬

宗道等宣諭賞賜海外歷西洋暹羅瓜哇呂宋琉球日本天方等三十餘國經十餘年乃還

吳高江陰侯良子嗣爵靖難兵起高守遼東與楊文數以兵攻永平文皇曰高雖怯行事差密文無謀去高文不足慮也遣人遺二人書盛譽高極詆文故易其函投二人所二人得書並以聞建文君果疑高削爵徙廣西獨命文守竟敗洪熙元年上見高名曰高往年多行無禮謫海南陳芝英曰高之才至爲文皇所忌則豈庸庸者哉吳之失侯以多行無禮故則高之心事尤可白於建文君矣

江陰縣志

卷三

職餘

古

王華一世軍籍聽調明靖難兵起代父北禦燕師戰白溝河陣亡

鄧光遠安南人永樂間因黎季犛之亂率眾內附拜工部尙書子師晦任九真知州以言事謫江陰主簿廷議以推誠順化勅賜善政橋南宅一區馬馱沙田二十一頃未幾坍沒接壤新沙復漲鄧氏請補額邑侯許達道詣灘履勘返棹中流狂波突撼舟人惶駭失措頃之若有負之而趨者頓達淺渚蓋治北五堡地也江涓之人名其地爲使君灘相與傳其事而異之金壇于孔兼有涉江紀異碑記在南門駐節亭右東平廟中

靖難時邑東鄉有王某者感事詩曰平地龍蛇起戰爭奔騰海上陷連城煙生趙衛郊墟赤血染青徐草木腥管蔡妄圖終見殺夷齊固讓永全名小臣一死無餘事厲鬼還期報聖明

周岐鳳能詩文兼習吏事豪放不羈常參徐晞幕事不合去坐事亡命有錢昱投以詩曰琴劍飄零西復東舊遊清興幾時同一生作客如張儉四海何人是孔融野寺鶯花春對酒河橋風雨夜推蓬機心盡付東流水惟有家山在夢中岐鳳得詩大慟後客死秦中

青州府志名宦載楊信民江陰人永樂初令某邑多惠政

江陰縣志

卷三

識餘

五

時修永樂大典徵天下文學之士信民與焉著有性源珠璣四卷又青州道題名碑有陳孺號芹山錦衣衛籍江陰人癸未進士俱見迂叟叢談

青陽民葛氏家貧有老母夫婦資賣酒以養務罄利之所入極母嗜好一夕有道士酤百錢酒遂借宿焉夜聞指爪聲明早失道士所在牀頭有桶但見爪刻蓬萊仙境圖深入木理好事者墨摹之惟恐後葛氏家日漸豐母登上壽人謂孝感所致王逢有詩云道者深藏玉斧才罷修明月上蓬萊笑隨流水天台去袖裏登州海市來霧峴雲窗開翠壁異香靈響接瑤臺神遊萬里愁回首

故國蒼涼獨雁哀

正統初有劉士宗者頗讀書尚氣俠郡守莫愚貪酷士宗抱不平奏其不法數事上命大臣置辨於午門外兩人不伏宗伯吳澐以鄉人稍勸解士宗大詬曰汝欲愚庇其家而壞朝廷法耶歷數其過聲振禁闥諸臣以莫爲能吏而士宗言有理奏兩釋之

大司馬徐晞初爲縣兵曹沙張白筆記云江陰令某一日坐堂司鼓者報鼓壞令卽發票付匠索鼓書務要字而構語不屬顧晞曰下語當如何晞應聲曰務要乾木圓腔緊紉密釘中邊異響晴雨同聲令悚然曰君才非常

江陰縣志

卷三

識餘

夫

人也祝允明太倉州學記曰永樂間晞奏言天下武衛無有司可附者得輒立學宮便詔從之

周珪字孟敬出粟助賑周文襄上其事於朝詔旌其門楊士奇題詩待漏院曰五更朝罷月如鉤環珮珊珊出鳳樓借問江南誰好事人人只說顧山周

江彥章宣德間進士令江西星子縣初蒞任邑苦流亡戶口彫弊彥章輕徭役緩宿賦課農桑廣積貯剔弊芟奸勞來安集未終任戶口三倍因興學課任九年邑多雋才富庶甲於郡以卓異引見卒於都歸葬星邑人聞之奔喪來里者皆踵墓哀號墓在今桃花鎮六保相傳爲

江進士墳顧考郡邑志甲科中皆無此人姑存此以俟考

景泰丙子秋闈邑令朱珩設燕餞諸生酒半朱親酌金叵羅離席立曰諸君此行有自信作解頭者請飲此觴眾相顧莫敢前吳啟獨趨飲之朱喜曰君能踐言吾親至雲陽相迂榜發啟果第一朱益喜曰偵其歸啟畱鎮江無行意朱悟曰吾不可食言於吳君遂自迎之丹陽一時傳爲佳話云

徐經字直夫同年十五舉子之一與吳門唐寅並以才名相引重寅領戊午解經與俱北上吳門都穆惡之蜚語

江陰縣志

卷三

識餘

七

流聞京師經竟與寅同鐫名歸益肆力詩文著蕢感集黃傳贈詩曰夏商人物徐直夫周漢以來人世無窮年對坐不見客閉戶反觀恆喪吾四壁芸香時落蠹千倉紅朽食無魚迂余老眼亦空爾公是公非敢厚誣

析津日記云重建三里河橋碑記翰林院修撰江陰周敘撰朱彝尊記謂三里河者都城南隍水之支流創自天順間歲久橋圯正德間重建江陰周敘文以紀之舊志選舉無周敘名

黃傳涖任日掾吏易其少也傳自韜晦常側其帽視案牘場若不省者至十日坐聽事吏請正冠傳曰正冠當排

衙斷事命吏抱牘雁行進一時判決如流悉中條理吏民驚以爲神東鄉有顏刁郎者爲暴鄉里邑紳以其祖暄故常庇之前令輒爲飢法傅廉得捕治預誠隸曰顏某貫盈明當鞫問若杖下不斃命者汝輩當死至明晨爲請釋者踵至傅使人傳語曰姑杖之耳果以一杖而斃

黃傅迎燕乙卯科同年十五舉子彩聯云入國朝一百廿年未有此科之盛總直隸九十七學誰爭吾邑之先送某貢士廷試聯云十載蓬窗雨黑燈青熊膽苦一朝雲路柳明花媚馬蹄輕送湯沐令崇德聯云南面專城直江陰縣志

卷三 識餘

六

與天王分土治東風匹馬或從野老踏莎行可見賢令鼓舞育才之意

舊有警夜之詞令役夫振鈴而謳之語意俚陋黃傅爲更之云一更鈴萬戶千門盡掩扃二更鈴月上花梢庭院明三更鈴萬籟無聲寰宇清四更鈴海國天雞次第鳴五更鈴盥漱衣冠內外興

武宗朝逆瑾傳勅譴責忠良目爲奸黨勅中五十三人而江陰居其三主事黃昭御史貢安甫史良佐也

蔣一龍正德時諸生應直指試作蔡京父子相軋判云周公相而伯禽封忠輸內外鄭桓卿而鄭武繼職善開承

故挾篤裴之忱何嫌夾輔恢濟世之美豈厭同朝德乃
下衰恩斯冒濫霍光操廢立之柄進禹司徒安石執變
法之權推雋侍講樹黨一門竊官再世是固昧君臣之
義然猶全父子之恩若石厚之輔州吁石碯以先臣而
見殺懷光之叛唐德李璿以入侍而告謀則義有重於
朝廷恩難兼於骨肉今也蔡京以詔佞得政既非穀詒
蔡攸以權勢超遷尤非武踐乃者位漸肩班忌由心出
邸館自開各納買官之賄客賓分附頓生奪要之疑震
用事而上九當退於無爲京猶戀位乾居尊而六子未
乘乎幹蠱攸敢同升既不識父子去就之機謂宜篤僚
友協恭之節蔡氏均有罪矣宋室亦曰殆哉邑令萬垓
美其才浮白賞之至醉

江陰縣志

卷三

識餘

九

劉緒號瓠山大司馬光濟父業賣漿一日里少某困於賭
日晡竄身槽房中緒見之使其僕歸曰吾今晚款一客
可多具殽來僕旣行乃肅里少出曰子誠良家子一爲
吾僕見將終敗爾身今敢置一尊勸子改行殽至乃與
歡飲臨別贈以二金里少慚謝請徙業爲屠沽卒以成
家然緒性方嚴人有怨之者夜繫病夫於其門而思以
詰朝圖命四更時里少經其門見之潛負屍疾趨挂花
山枯樹比明失屍所在其人計窮而止

劉應谷光濟爲大司馬趙小峯與治爲所屬主事一日同鄉聚飲相謔趙謔而虐劉曰若今倔强異日大堂參謁亦敢倔强否趙怒曰吾可終身不仕竟升與去劉歎息引咎次日親詣小峯寓再三請見趙固不出劉婉曲達意終身不存繼芥嫌大臣謙而能容小臣介而不諂兩人俱古道可風也

湯沐公餘日錄云予仕武義時適奉部檄旌表節婦朱氏先期召婦入邑蓋鄉民徐信妻年二十三寡其子文敏己年六十矣用彩亭二一置金縷一置文牘題彩聯云喜聞鼓吹喧通市羞殺琵琶過別船一云食茶敢謂當

江陰縣志

卷三

識餘

三

年苦啖蔗方知此日甘一云地無塵土沾荆布天有恩波載柏舟以竹輿坐婦導迎徧城市許婦女縱觀仍偕儒官送至其家蓋奉宣德意固臣職之大端表勵風俗尤親民之首務聊竭此心而已

夏港徐翁其鄰煮河豚子竟夜不熟賣之則傷人棄之則折閱翁出千錢盡買而埋之不數年長子沾次子與沐皆登第

梅國光嘉靖辛酉科中式已列名於榜矣有江甯縣應役人旁覷而喜監試官疑而詰之隨汰國光名蓋其時國光父立中以江甯縣主簿爲供給官役人急欲走聞故

也國光上主司詩曰早歲虛名冠士流五千聲望一時
收自期已是龍門客豈料還看江國秋泣玉何年方定
價遺珠在海向誰投無緣識得荊州面豈羨榮封萬戶
侯至隆慶庚午復中式

嘉靖間倭犯太倉任兵使環檄江陰兵三百堵禦方進史
家浜倭斷浮梁我兵李梓一作俞謹王忠劉誠葛復張

四俞秦田誠楊繼賢趙紀子八十餘名皆戰死後任督
兵江上其子遣人候問公作書并詩遺之詩見藝文

老儒薛亶諸生沈受益皆讀書有氣誼錢侯歿後倭復圍
城士大夫作書欲請兵上臺無敢往者亶慨然請往撫

江陰縣志

卷三

識餘

三

院受益請往按院晝伏夜行聞關得請援至而圍解設
太平燕亶首坐受益次之

孫阿佛市中少年也嘉靖間倭作木衙裹牛革攻北城將
破孫乘醉登城呼曰倭賊何在舉三百觔大石擲下碎
木衙打一倭足反出背上曹鬍子偕同伴三十餘人

列濠外倭至眾渡水遁曹殿後倭追及反兵刺倭殺之
楊朝相年十七與倭戰於城南被害其兄朝卿亦歿
於倭難陸朝郭泰主簿曹廷慧親兵也禦倭九里河
倭渡水至朝泰立高岸視先渡者櫜格之墮河倭眾揮
刀繼進斷櫜并落朝一指負痛大呼奮躍格殺羣倭奔

遁 葛生賣卜人父子被倭阱於營倭火藥盡葛請畱
子而代市藥復請同製陰習其法乘夜竊藥與子縋入
城因是城兵知以銃彈擊賊 丐者張關竄入倭營倭
狎不疑乃潛取其銃彈入城一日踞堞視倭中飛彈死
松江推官吳時來奉檄至江陰練兵適他郡解倭首七級
至吳憤然作色抽刀呼酒破首取腦立吞數甌曰吾爲
錢鶴洲雪恥矣

趙文毅諫張居正奪情事廷杖歸沈懋學有詩送之云莫
厭清時見逐臣主恩深處五湖春煙霞耐可丹心老雪
曉驚看白髮新愧殺虛名成畫虎愁來吾道繼書麟獨

江陰縣志

卷三

識餘

三

醒未許漁人笑歸去花溪共釣綸

夏正名諸生少有異資多讀書落筆輒喜自負忽得顛癩
科跣狂走臥不擇地時學使歲試教官已爲注病籍正
名走至宜興試所作詩祭儒巾於院門去其詩云殷勤
交付破頭巾懶向金門再獻身草履暮投山寺月木瓶
朝吸洞庭雲生涯雪嶺兼梅嶺蹤跡山盟共水盟野鶴
本來無住著逃儒非是爲逃秦自是遂顛不可療然爲
人推命卜易多奇驗頗資以自給

袁一驥宅在長涇鎮北三里其父禹臣書四本堂額之謂
讀書起家之本循理保家之本勤儉治家之本和順齊

家之本

尹嘉賓負高才歲考時列四等次年授徒無錫顧文端稔其名令人索制藝觀之尹初不欲不得已書前四等文與之文端激賞其中四行曰異日必冠南闈不知卽有司所塗抹之四行因而置四等者也明年尹果登解成進士

萬厯間有縫鞵者蒙茸蓬首衣不蔽體獨身寄廣福寺廡下問其姓曰顧問其名曰無或憐其貧稍給之卻不受爲人縫鞵或多予之以示惠取及本值而止見不義富貴者輒肩皮籬唾而疾過

江陰縣志

卷三

識餘

三

顧大愚字玉川眉稜峯起髯長尺餘衣冠好爲奇異時或楮衣握玉麈尾乘駱駝入市隨虎鹿各一駝背挂葫蘆藥囊古瓶瓶插非時鮮花少得異人術日行五百里一食數升數日不食亦不飢

李玉仁本農家子粗知書慕節俠鄰有少年聘妻貧不得娶妻父母憎其貧以女與武人爲妾玉仁謂少年曰子盍訟之曰彼挾權勢訟必不直玉仁怒然自忖力不勝武人乃僞爲輿徒日伺候其門久之聞其妻若妾欲詣廟進香玉仁厚遺其徒與之謀旦日其妾登輿竟昇歸少年家武人訟於官玉仁亦奔愬官鞫少年先聘狀不

直武人以女歸少年邑人咸多李之義

貢隆教字敷五江上九子之一崇禎初無錫友人陳卿茂爲豪僕毒毆隆教奮身往救被毆死卿茂幸脫率五邑諸生哭呈學使者爲隆教復讐沈志徐時進傳貢隆教有同室之難集同社聲義卽此事也

徐仲昭遵湯工古文辭困於場屋以明經應銓司李少與相國周延儒同筆硯抵京角巾葛衣往謁周不卽出使人問曰以謁選至耶以遊覽至耶徐愕然問謁選當如何周又使人傳語曰謁選當易刺以揭易便服以公服行庭參禮拜堦下徐率然應曰吾以遊覽來非求仕也

江陰縣志

卷三

識餘

舌

周出見交拜執賓主禮仲昭遂束裝歸隱

劉沂居城南閒行九里河口見道旁遺一小箱坐而守之俄一人引青衣倉皇至叩之卽失物者箱中黃白等物一一不爽盡還之求姓名不對

賣餅叟年九十餘甚矍鑠日賣一筐於市卽沽酒醉君山巔唱大江東去北望嗚咽生五男十二孫及曾元多人皆業餅見流氛漸逼命長孫遷錫邑後叟聞金陵破沈江死子孫俱殲於乙酉之難

黃憲字子貞貌寢能文乙酉春書楹聯於廳事云按劍豈忘仇九世拂纓無奈髮三千難作憲以不肯薙髮闔門

死蓋聯語先見其兆矣

徐趨之客有李玉奇者以獵爲業重趨爲人願捐軀命隨之事敗戮於宜興之長橋抗聲謂觀者曰吾視死如歸無所恨也觀者皆憐而敬之所畜獵犬一行必相隨至是見玉奇被戮哀號跳躍以舌舐其血血盡跳橋下水中死

顧齊范字子雲齊程字子鶴皆有雋才乙酉之變齊范奉其父出城避難而留齊程守時齊程未冠請其父冠而後別父問故曰城苟不保豈可不冠服以見先人地下乎城破力戰不勝投池水死

江陰縣志

卷三

識餘

五

黃鳴岡善騎射常橐鞬出山左聞山上嚆矢聲卽彎弓發一矢與飛鏃相觸墮地暴客咸畏之往來商賈恃以無恐有盜賃客裝雜商隊中行鳴岡不覺一日行近賊巢賊騎衝之鳴岡欲發矢忽一客突前奪其弧倉皇被縛置空室中將殺之有一少婦謂曰君得無江陰黃某乎誠豪士曷爲被縛鳴岡曰若亦爲所掠者耶能釋我當出汝於阱女抽刀斷縛鳴岡挾其室中利刃弓矢挈女行見廐一騎甚良遂並坐其上疾馳得脫女泣曰吾父官兵曹今春移眷過此全家被劫戮死吾所以不卽死者欲一見嚴親鳴岡走千里送女歸其父厚遺之不受

迨江陰城被圍鳴岡製藥弩百步中人城破被繫北去
帥以奇技將用之遁還

乙酉死事未經旌表者 朱隆祧字慎初家素豐兄弟友
愛難作隆祧勸兄率姪遠避而已獨守城破死事平覓
屍不得遂以血衣葬 王永光字元彩本姓夏摺書衛
身與二子戰死文昌巷口年三十八妻李氏女二婢四
投井死僕古元死曹家池內 胡志學字熙雲隨張國
維禦賊於安慶及城中起義詣黃蜚乞師不應奔常熟
嚴柵處越五日城破柵復起師於宜興志學率舟師接
戰於河口力鬪死年三十七 耿鳴雷字元聲庠生少

江陰縣志

卷三

識餘

美

負氣節城破兵脅之瞑目叱咤一門俱死 陳廷獻字
售之城破以短矛接戰文廟泮池外中矢死妻投井死

子女俱被殺

以上已附
三公祠

黃永茂字進卿諸生毓祺從子

同鄉勇擣敵營恃銳深入死之 黃正鶴諸生城將破

令妻媳投井然後自投後發其屍色如生 馮鈇字無

咎諸生子廷用亦諸生父子助城守皆死 武進韓氏

僕金泉爲江陰皂隸城破自經死 不知姓名皂隸戰

甚力城破盡殺其妻女提刀出遇兵殺六人遂自刎猶

提刀不仆 葛輔弼父子泗港人率鄉勇五百赴援至

三官鎮眾盡殲

以上見水
心齋筆記

高錦伯諸生抱親屍死池中

旬日如生 黃楚翹字弼明赴水死 諸生周景陳枚
卜曹信臣布衣黃錦雲戚磐俱死 黃鳳岐大小數十
戰城陷力竭死時有立城上頭中鉛彈而僵立不仆者
又有胸背被礮洞穿直立而死者 典吏王朝用自縊
死 都司沈三陸義鄧五安麻子等十四人從徐趨攻
城不克而死以上見成仁譜 馬遇伯利城諸生甲申聞變同妻
金氏赴水死 曹有章字斐卿庠生城破悲號欲絕滿
壁書大明二字絕食五日死 袁一駒一義一智一鸞
一鴻一鶴皆中丞一驥族屬一義尤爲眾所推服南都
立奉檄以都司衛守京口歸而城圍偕諸弟糾集鄉勇
赴援至三官鎮遇兵死戰俱歿於陣一騏子大來在圍
中城陷日死 王之蕃與其子元得同死以上採訪
邑中詩社明嘉靖間大雅堂詩會有劉光濟沈奎季科陳
體文花周鄧欽文黃道諸人此外無考萬厯間滄洲社
有許學夷莊孔章周俊徐益張驥能張純臣黃繼元鄧
汝舟高階張嘉孺姜泰吳元良沈鶯陳震周郁文宦進
周從文陳康黃汝宗李可教袁爾振邱維賢并釋隆修
女史張玉眞等二十四人

國朝順治間芳園雅集有章耿光陳芝英陳廷策周駿聲薛
日宣諸人此外亦無考康熙間從野堂詩會有朱廷鑑

盛樹廉吳永福周榮起黃安雅徐章趙鳴鑾韓袞陳玖
劉爾鼎黃子聲陳心濤趙彙沾高顛生朱月川等一十
五人

陳廷策字墀獻究心易理鼎革後遯跡山野李介立贈詩
有由里山前隱君子手易一編七十矣又有他年乘載
求遺賢采入簡編成信史等語

徐世隆字爾紳道署掾順治初有富室以沙民抗租誣告
其反者巡撫檄道原毓宗勦之世隆叩頭請緩須臾審
虛實原曰良民告密羽書督促此何事而敢云緩世隆
涕泣爭益力原爲動容沙民千餘持香陳訴原遽出廉

江陰縣志

卷三

識餘

三

得果無反狀歎曰昨非徐世隆幾誤矣順治十六年海
氛猶未靖有千餘船溯流而上破京口圍金陵旁犯溧
陽句容巡撫駐兵常州時江陰兵僅城守百餘合兵備
標不滿千兵使胡亶以單弱爲憂謀以家室歸世隆進
曰公爲一方保障苟一動搖則民駭兵散大患立至今
兵卒月糧已踰四月未發有怨望心不如疾發之再預
給以二三月糧則兵心可固更料民兵上城具糗糒以
餉之使列守以張勢則民心亦可定胡曰善卽日發糧
列戍士氣倍奮頃之海舶銜尾而上胡欲發礮擊之世
隆復進曰彼所以不攻江陰藐茲小邑耳今遽發礮以

激其怒所中者纔一二船而彼迴舟上岸直糞粉矣不若多列旗幟以張聲威彼望而畏之我得以徐爲之備胡又曰善從之海舶遙望列戍數里軍容甚盛不敢傍岸驛騷兵民安堵悉世隆力也

太倉陸世儀初來江上執贄稱弟子者二十餘人有邢衡者積學躬行年已八十見陸論學酬答及思辨錄二書願師之陸不敢當作邢長者說贈之答其刺猶自稱晚生而邢卒執弟子禮時邢長陸二十餘歲一時傳以爲奇

奚又溥字天如敦行好學表章元明前輩遺文纂輯成帙

江陰縣志

卷三

識餘

无

張元昇贈以詩曰寂寞荒江水石麤西風門巷欲啼烏新霜紅葉美人暮舊鬼清文老手扶落日小山深院冷淡煙喬木破窗孤可憐一代空遺墨藉爾風流尙未枯書院山長題名自沈濤始濤之前有錢肅潤字礎日無錫人教諭荆子邁請主講席江上友聲序其所作也

乾隆七年十一月奸民鳳朝選潛至俞金聲家將其妻陳氏挖傷兩目并腮頰里鄰奔救解縣鞫訊係圖姦不成遂行兇縣將朝選禁擬十二月初二日獄卒報朝選忽仆地自殞眾快其遭天譴氏鄉曲婦人能守身於強暴凌逼之時亦可嘉矣

江邑鄉民有喪合村巷男婦坐食其家無少資助輿臺又借喪車舉重棺罩等件勒索僱錢不論貧富閭閻多致鬻產稱貸因而破家者華墅人孫元等出貲作喪車里中公用不取僱值又有製棺上幕供親友借用者俱得古人哀有喪之意良法可通行邑中也

舊傳邑人有題昭君圖詩云驪山舉火因褒姒蜀道蒙塵爲太真能使明妃嫁胡地畫工應是漢忠臣語意奇卓惜逸其姓名

乾隆三十三年秋旱成災西鄉農人相率鬩縣堂學使景福甫下車撫慰饑民眾卽解散越日巡撫彰保統兵至

江陰縣志

卷三

識餘

三

欲痛勦之景與議不合集書差問有能七日賫摺至京者眾推杜元裕徐大本卽發銀百兩令速辦裝二更上道果六日零十時抵都摺旣上而彰保摺始至以民亂聞景則以民饑告先是學使爲曹秀先

上召問秀先具以災對蓋秋旱時秀先曾兩次祈禱卒無雨故也遂定讞置首事民沈天益吉爾法等於法餘悉宥姚文僖督學時念邑殉乙酉之義特書忠義之邦四大字諸生何春煦於君山梅花書院中構仰止堂摹勒厝壁芮孝子名達舉旌德人隨父之定寄江邑長壽里之定販參往來關左爲盜所劫落魄不得歸達舉附海艘往覓

父中流舟覆抱浮梗以免至登萊遂陸行書父名形貌於版背負之且行且泣歷訪數千里及三載直抵遼東天苦寒之定方煨馬糞坐土炕中見達舉訝甚詢所自來相抱而哭哀感行路遂扶親歸年已八十矣

李遜之承忠毅公世澤家有藏書甲於通邑日得月樓陳其難素以學古稱積書數十年誦於力不能多備近時葉廷甲富於典籍構靜觀樓度書五萬餘卷名臣遺老述作未刊行者多梓而傳之

鄧添元至正人其主死於邊添於兵閒負骨歸葬王逢有義鄧詩

江陰縣志

卷三

識餘

三

顧山周宗苑與同時富戶七十人奉明祖旨俱令陷於梅子洲洲外環以戰艦約視植赤幟於江岸則俱斬首迨七日望見黃幟飄颻而出得蒙赦宥浸餓死者已二十餘人矣周僕馬關備乾糗潛伏於帥舟之柁以入於洲夜與宗苑掬水食之帥偵知怒命擒至旁有一弁跪曰某前時出獵至其家實良民也帥霽威遂獲免焉編管宗苑於廣西潯州義男周關代戍

康隆諸生李森枝僕森枝早亡妾周氏生子甫三歲隆從周攜孤避難蘆葦中兒啼周恐爲兵所覺棄之隆曰主止此子棄之是絕主祀也抱匿他處七晝夜得免

王豬兒十餘歲時母挈賣尤姓尤富室乏嗣族多涎之尤年八十五而納妾祁氏舉一子燕親族出子見客或以不類譏之尤慍遽跣左足命豬兒出子左足示之父子皆駢拇譏者慚而退燕畢豬兒告曰禍始此矣盍營三窟乎尤聞之泣託以保孤豬兒泣諾遂質保姆攜幼子遠匿會稽山購田宅以居別取他人兒冒爲祁氏子未幾尤死族人紛起爭奪計殺他人兒逐祁氏并速訟逮豬兒榜掠瀕死後駢拇子長豬兒挈之訟於官械獄者二十餘人盡復故產

王阿金故倡也董西來納爲室憚其父嚴置諸祝塘別墅江陰縣志

爲兵所執汗之不可詈不絕兵悅其姿弗忍殺乘閒投河死董出其屍貌如生藁葬顏家莊田中

卷三

識餘

三

諸生趙某家有老嫗乙酉八月二十日夜風雨泣謂主人曰城將破死期至矣盍早爲計指趙幼子曰此三歲兒吾能保之以延趙氏一脈於是趙夫婦同三男二女闔戶自焚嫗負其子出伏城隍廟空棺中凡七日夜事定乃出嫗藏炒麵數升於衣閒兒故得活兒後娶婦生男七人祇事嫗九十六歲卒

李家婢名杏芳性端謹主母愛之主母子二長三歲次二歲而主死明年主母病篤語婢曰奈何主人早逝幸吾

在可以撫二孤今若此旦夕休矣汝能撫之四年使長者七歲次者六歲可以操七箸汝然後嫁則吾受汝賜婢泣曰第自愛脫不幸婢當以死奉二孤數日主母死婢爲之斂且葬卽撫二孤家僅有田五畝勤力耕作暇則織紵辟績居恆坐必端立必正不苟言李族感且敬之樂爲之助以是孤得成立孤年弱冠或諷之嫁不從又數年爲二孤娶婦或又諷之曰吾年垂四十以色事人則衰矣吾將終老於是卒不嫁

翠梅陸寡婦陳氏婢也陳性卞急翠與夫稍失其意輒以頗焉其夫憾謂翠曰若安事此熒熒者而日在泥中耶

江陰縣志

卷三

識餘

三

翠不聽其夫竟去而他有室翠獨居日傭澣衣拈

陳陳好整潔翠爲之縫澣楚楚已則衣裯敝不以

且老陳嚴遇之者不改垂四十年陳歿斂葬皆翠料以

不三年翠亦卒翠嘗泣語人曰自主母歿後吾力不能澣衣矣

晉庾冰卜宅暨陽後捨爲祥符寺康熙五十年間有行腳僧住焉於寺前鑿井得一石圓如鼓腰有縫眾抉開石中心有窪藏一銀合啟之得一碧珠如龍眼大光采溢目眾欲攫取僧急收之或疑是墨珠以磨紙上字蹟應手而滅後僧囊珠不知所適

異僧道松草書心經本在廣福寺後歸郡城關帝廟釋音
可詩云心經一卷幾掀翻羅漢重書在壁閒忽被晉陵
人借去不知何日送還山嘉慶初重修廣福寺仍摹刻
於後殿

十方庵有貫休羅漢十八軸皆絹本水墨畫漉漫斷爛屢
經裝池其象皆瘦削露骨軸或二三尊或四五尊四旁
景物怪異樹石奇古彷彿吳道子之雄變奇譎也

僧曇素宋嘉祐中於廣福寺地藏殿後壁畫梁武帝召張
僧繇寫寶志公變相筆力遒健神彩欲活

僧象微宋嘉祐中於廣福寺法堂楣閒畫水一派甚工人

江陰縣志

卷三

識餘

畫

號象微水

元時光孝寺衲無言所藏畫龍甚奇柯敬仲博士題云道
人畫龍龍絕奇何處人間曾見一
京清暑朝初退太

液池邊看雨時

褚龍泉顧山鯉魚峰人幼習道術嘗遊姑蘇於元妙觀得
奇書數卷由是術益精乾隆初大旱楊舍設壇祈雨眾
請登壇伏禱良久下壇曰雨至矣時都司亦在挈以偕
行未幾大雨獨二人衣不沾溼都司給以馬鬣一滴額
輟耕錄載瘞鶴銘華陽真逸撰上皇山樵書末有丹陽仙
尉江陰真宰等字石刻在焦山下相傳爲王右軍筆歐

陽公以爲類顏魯公惟雲林子黃長孺以華陽隱居爲陶宏景最爲得之究不知作銘者爲江陰何許人

石筏山下崖壁入水最深處有方石狀如碑碣上鐫心經一卷遊者候潮落往讀之甫及半而潮至矣未知刻於何代蓋亦好奇者之所爲也

顧山周氏先世藏王逸少真蹟七十六字後有趙清獻公抃蘇子容等跋帖云二謝書云卽以七日大斂冥冥永畢不獲臨見痛恨深至也無復己巳武妹修載在道終始永絕道婦等一旦哀窮並不可居處言此悲切倍劇常情諸不能自任未遂面緣撫念何己不具義之頓首

江陰縣志

卷三

識餘

三

字畫亦無殘缺周氏子孫欲求售攜以問價於文衡山衡山曰此希世之寶也每一字當得黃金一兩其後三十一跋每跋當得白金一兩後周典於金閭富家止得米一百二十斛

隋太平公史萬歲墓在秦望山蘆崎院西半里許明孫作有夏日過蘆崎院詩

廣福寺殿前有古柏二株相傳爲唐代所植明人黃毓祺詩云何年古殿柏森森指出西來一片心不信無情能說法阿誰悟得雪巖欽

邱文定公宅在章橋有牡丹二本歲各開百花手植筆竹

二十年圍二尺許今莫詳其處

元妙觀舊傳鐘磬二物鐘一面有漢編鐘三字一面有太
清宮三字皆陽文小篆磬碧玉邊上一頭有大晟二字
一頭有太簇二字皆陰文古篆按唐天寶間爲太清宮
祀老子宋太宗大晟殿元豐七年造玉磬謂漢編鐘者
如漢之制非漢鑄也大晟是祀太宗廟太簇是磬應此
律皆宋物也

輟畊錄云宋理宗內府所藏蘭亭一百一十七刻內壬集
一十四刻江陰邱氏居其二焉後有跋載淳熙戈申二
月五日邱壽雋書下有一圖書篆暨陽邱氏

江陰縣志

卷三

識餘

三

朱彝尊紀云宋江陰軍乾明院碑載五百羅漢名號明工
部郎中高道素鏤板附釋藏之後按佛書諾俱那與其
徒八百眾居震旦國五百居天台三百居雁蕩今廣禰
寺泛海殿原碑雖在其下截字多缺宜覓高藏所刻重
勒分明俾古碑復完焉

恭帝德祐間王伯熊所撰父錄參從事礦志嘉靖十五年
邑大街虹橋溝東居民鏹地得之其文云先君氏王諱
建大字直方曾祖諱奉議郎累贈中奉大夫祖甯中奉
大夫直徽猷閣司農少卿父燾朝散大夫通判泰州軍
事先君淳祐己酉以百篇預鄉薦奏補將仕郎監支鹽

倉授安東錄參以疾歸買廬虹橋巷歲餘卒葬綺山之
原不肖孤伯熊敘次梗概識諸墓奉議郎知江陰縣事
高純厚填諱

梁友直集云江陰王庫使家藏黃筌雀哺雛卷有劉後村
詩跋嘗聞右院畫率有名義是三雀者殆取詩禮春秋
傳三爵之義歟贊曰觀雀哺雛可以知仁仁於鳥知於
雀之身雀知有子子知有母飢焉思哺食在母口嗟彼
雀矣以鞠以育矧伊人矣孰無天屬幼資其親長養其
親天屬至親勗哉世人

江陰侯吳良有賜刀一口上有金錯龍鳳文其銘曰百鍊
江陰縣志
卷三 識餘
三
金鋼殺氣難當將軍佩此威鎮四方其後人貨於顧山
周氏爲常熟楊五川儀得去

沈翰卿有由里山宋妃墓詩云重見山僧頭盡白一抔荒
土記前朝麒麟草沒春無迹蘭麝香微骨已銷世上有
人傳玉柙山深何處望雞翹殘花滿地鶻聲切寂寞芳
魂不可招今墓不知所在

興國寺西房有楊忠愍公獄中所書墨蹟絕句一章詳見
徐恪玉帶草堂詩集

閻忠烈父名國才母王氏墓在定山爲營葬者忠烈壻陸
祚昌之父名見岑字振先者也乙酉之變

大兵臨城八十餘日及城破薙髮者不戮從東門出者不禁而公家屬安然無所株連我

朝如天之仁豈三代以下所可及哉

澄江八景舊爲蓉城曉煙巫門夜雨海門賓日孤山釣月石灣春霽揚子秋濤沙嶼晚渡淮甸晴眺元人俞遠有詩贈炙人口乾隆初知縣蔡澍剛去海門賓日孤山釣月沙嶼晚渡淮甸晴眺易以鷺鼻積雪奎閣層雲前湖漾月盤石流泉名流亦多詠之

雍正間黃田港漁人沈網江底忽重不可舉呼其伴共出之得五鼎其質鐵兩耳四足高尺有二寸長一尺闊七

江陰縣志

卷三

識餘

亥

寸其文爲雲雷卦象飛廉饕餮狀旁有釘列如榆莢錢底有字非篆非隸或辨爲漢壽亭侯鼎字人竊去其二存者在港口天妃宮

萬厯甲寅花涇口海夜嘯平明漲出一沙約六七里上有磚磬街街上堆古錢數萬居民爭拾以歸驗其文悉宋崇甯通寶錢也

邑有倭警迎春日止雷東門出入餘三門俱閉以防變也臨晚城外人蜂擁入城門壅塞踏死四十七人老者少者俱立時斃壯者或扶回死或遲延二三日死爲一時異變云

綏寇紀畧云崇禎十六年江南自京口至江陰無錫曉起或以黑圈記其門或釜底畫梅一枝一夜殆遍邑民多製紙礮有陳姓者父子三人治藥磨火忽發廬舍俱焚三骸迸裂爲禍甚慘

雍正十年七月十七日江湖泛溢傷田廬人畜先是月餘有鳥大如鸚鵡毛羽盡黑飛鳴樹間如呼阿瘡然聲急而惡水患至遂絕跡

黃志物產木之屬冬青可放蠟視樹上礪塊密綴如繁梅之蕊者是爲蟲窠夏日小滿取而閣皮枝柯間蟲則散布啞樹旣而所啞處生白毛日漸厚積立秋處暑之候

江陰縣志

卷三

識餘

三

剥取而煮之冷則蠟凝水面謂之白蠟旣取蠟枝上起痂如小兒痘疹寢以湧大至明年二三月連枝翦落之蓋盡爲蟲窠矣蠟質堅和黃蠟雜油爲燭清亮久照鑄相燭者或以盪燭範則外凝中融風不能爍其利甚溥惜土人不善用之

顧山有紅豆樹作花無定色占年者驗紅花主旱白花主水花開一面卽應一方之水旱

邑產惟木棉布爲最夥然織婦工多利少收其價值不足以償勤苦惟樹桑治蠶絲帛之利可抵耕耘或能講習其業俾布帛兼資以爲水旱凶荒之備則人事之修可

補天行之缺邑瀕江正古所云下隰宜桑者桑旣不足則蠶無所飼因棄不育遇歲木棉不收紡車空懸是在有以開其利之源矣

雍正七年夏章卿鎮如來橋陳子建之繼子某在枯棟樹椿邊拾得鮮葦一筐下午煮和麵食一家五口日落時俱斃鄰里發視樹根有赤蛇數十盤穴其中方知葦爲蛇氣所結也

萬厯末有商舟浮江來艤黃田港舟人死藁葬城北舟人故畜一犬繞墓悲嚎逐之不去商舟解維犬尙臥墓下寒暑不暫離居人哀之咸給其食且爲草窟以庇焉

江陰縣志

卷三

識餘

罕

博瀡里某畜一犬對宇居者時與之食後某死婦卽嫁對宇居者犬遂絕不入其門與之食亦不食竟悲嚎餓死徐遵湯作烈犬行紀其事

黃志云舊志列女諸條各有陳述禮義矢志誓節之詞今悉不取蓋其秉彝之懿天質之美自有執法不渝篤蹈烈矩者非必盡嫻詩書善辭命也卓卓一節儘足以照映來世君子有取取此而已何用是贅疣蛇足爲哉

嘉靖丁未知縣趙錦修縣志聘學士張袞同諸生林文煥徐鳴玉劉珪蔣龍吳允五人設局延陵書院林欲削黃志中三節婦諸人並心非之而林執之堅竟削去是夜

月色皎然其步院門外林與徐見三婦跪訴神前驚顧
三人三人俱無所見林卽寢疾五日卒

張袞評黃志云多取而寡要搜奇而眩實君子思見其初
焉蓋不足於黃志也不知黃公每事必從風俗人心起
見至於言重詞複而不能自己此中苦心袞固未能窺
見也

趙志凡例云人物舊有分類今統言之何也全盡人理無
忝所生赫然爲世名臣爲儒正宗其上而下是而以一
節名者通謂之賢也觀於其傳而其大小偏全見矣

沙張白叢談云吾邑志書莫善於黃志識旣高遠筆復古

江陰縣志

卷三

識餘

聖

勁其後方謨續之續所當續足矣乃爲張水南改壞至
崇禎時馮令君再修之而穢濁不可問矣康熙年沈令
君聘予修縣志予以他故未赴盧郡君聘修府志不得
已赴焉其中多不可問者故志宜續不宜修也

南澗河深潭中鄉人相傳有神物於月下見光從水際出
與月相映射又或如琉璃屏浮漾水面乘風行倏忽數
里咸豐六年河竭見潭居民汲水見有一巨蚌眾欲取
之水極冷不可耐縛以索殼忽開索皆寸斷復謀鬆繫
而曳之口噴寒水人皆股戰眾懼乃止

江陰縣志卷之三十終

